

Mokokchungnung NCC Combined Annual Training Camp tenzükogo



Kohima, Aenjeti/January 06 (TYO): 25 Naga Bn NCC nung affiliate süa aliba school aser college tem nungi NCC Cadets pur Combined Annual Training Camp ka Fazl Ali College, Mokokchung nung tenzükogo. Iba camp nung Mokokchung, Mon, Tuensang, Longleng, Shamator, Noklak, Wokha, Phek, Peren, Chumukedima aser Kiphire nungi cadet 250 shi arua shilem agir.

Cadet tem adenshiba sülen COVID tendanger ang camp telungi aitdaksü. Iba sülen Blood Centre, District Hospital Mokokchung nungi Dr H Tsipongchem Sangtam-i anir team kati cadet tem blood group tendanga blood

group card tem parnok nem amoktsü.

Iba sentong tenzükaga Col CST Swamy, Camp Commandant ajanga jembia liasü. Iba mapang cadet tem asoshi training sentong balala yanglua aliba aser yimya balala indang metetdakja liasü.

Lt Col Pradosh aser Associate NCC Officers aser Permanent Instructor Staff tem iba sentong nung dena liasü.

Iba sentong nung Molodongba, President, Mokokchung Voluntary Blood Donors Association ajanga azü tenla agütsüba tajangzük indang onük nung jembia liasü. Tenla agütsüba azü ya nisung temang nung azü tali alibatem dang lir aser azü tenla

agütsüba ajanga temang nung timtem kecha magütsür, ta pai ashi.

Athili, Chief Manager of Financial Inclusion Division, State Bank of India Mokokchung ajanga sentong nung cadet tem den financial literacy indang jembia aser saving bank account lapokba tajangzük indang rateta shia liasü.

Paisa Atal Pension Yojana aser Atal Bhima Yojana amala scheme balala indanga rateta shia liasü.

Iba camp ta January 12, 2023 tashi alitsü aser iba mapang PT, Yoga, Drill, Weapon Training, Map Reading aser saisapong alitsü, ta Camp Commandant ajanga osangbener dang shia liasü.

Noklak nung District Hospital atema nungshilong azüngogo

Dimapur, Aenjeti/January 06 (TYO): Noklak nung aliba Community Health Centre (CHC) nungi District Hospital jenjangi ajungkettsü asoshi nungshilong ka Minister, Health & Family Welfare, S. Pangu Phom-i semzükja liasü aser iba sentong nung Advisor, Prisons, Printing, and Stationery H. Haiying dena liasü.

Iba mozüki ya sorkari upgrade sütsü saka mozüki tekeraba nung tajungba jenjangi ajungkettsü yabo yangi aliba nüburtemi yariba

dak keta lir, ta Minister Pangu-i ashi.

Iba mozüki atema ali tenla agütsür dang pai pelaba lemsatep aser district hospital yangludanga meinprong masütsü pai ajungshia liasü.

Paisa nukla tajung akaba leniri nüburt asoshi bendanga agütsüba dak rangloker yaritsü ayongzükja liasü.

Iba sentong nung Advisor H. Haiying-i o tatsüka jembidang, nüburtemi telungjem nung inyaksü ajungshia liasü.

Chief Minister Neiphiu Rio lenisüba kübok state sorkar aser Medical department-i district asoshi tajung bilemja inyakba atema pai pelaba lemsatepa liasü.

Pai Noklak nung aliba nüburttem dang iba ki-o-jen anepalua staff den yariteptsü ayongzükja liasü.

Kasa sentong nung DC Noklak, TPRO tir, KTC tatong tir nungeria district hospital yangluba indang nung ajemdaker o tatsütsü jembia liasü.

Kohima Police-i ozüing alema mapa tamajung inyaker ka apu

Dimapur, Aenjeti/January 06 (TYO): Kohima Police sangdong ka ajanga ashiba agi, December 30, 2022 nü highway nung mapang shia rakzükraktermer aser telungpur telok balala atema saru bendener kati Peducha bridge anasa truck driver ka pua bener ao.

Osang angazükba sülen bushitetsü asoshi police team balala nem osang agüja liasü. Kanga junga bushisüngdangba sülen SDPO (N), Kohima lenisüba kübok Kohima Police team ka

Dimapur-i temolung melemteti alisang aputsü arsanga alu, ta sangdong ajanga ashi.

Temolung melema alisang indang gari ya arishia orr Nepali Bosti Junction, Dimapur nung apu aser tai tonglokja alisang Nawaz Khan (27 years), S/o. Md. Ibomcha Khan, R/O house No. 58, Ward-1 AH Road, Khermahal, Dimapur Sardar pua Sechu (Zubza) PS, Kohima bushia bener atu. Aser iba dak sendakba nung ken o ka benoka lir, ta sangdong ajangasa ashi.

MSME MoS Bhanu Pratap Singh Verma-i Peren semdang



Dimapur, Aenjeti/January 06 (TYO): Minister of State for Micro, Small and Medium Enterprises (MSME), Bhanu Pratap Singh Verma-i January 5, 2023 nü Peren district semdang aser Deputy Commissioner, Peren indang Conference Hall nung district ktdangsur den senden ka mena liasü.

Iba senden ya Deputy Commissioner Peren, Vineet Kumar, IAS lenisüba kübok mena liasü.

Iba senden nung RD, PHED, Agriculture, PWD (R&B), Social Welfare, Horticulture, District Industries Centre, Health & Family Welfare, Power Department, Fisheries, Lead Bank Manager, Land

Resources aser Water Resources department tem nungi ketdangsur temi pei department kübok centrally sponsored scheme inyakba osang agüka liasü.

Minister-i central scheme mapa kuma inyakba department ajunga dang item scheme ya tajungtiba nung amshitsü ajungshi aser ano akokba nung centre-i yaritsü, ta shia liasü.

Minister den ano District Administration ajanga New Market, Jalukie nung Electrification Project, Punglwa Village nung Amrit Sarovar tesemtem semdanga liasü. Paisa Punglwa 'B' Village semdanga Jal Jeevan Mission nungi tajangzük angurtem den sensaksem kaa liasü.

Niuland nung SVEEP Mobile Van semzüktsü



Dimapur, Aenjeti/January 06 (TYO): DEO Chumoukedima kübok SVEEP inyakyim nung shilem ka ama EVM/VVPAT awareness atema mobile demonstration

van ka Office of Deputy Commissioner nungi Deputy Commissioner, Niuland, Sara S. Jamir-i January 5, 2023 nü semzükja liasü.

Mobile van ya Niuland

Town market area nung amenok aser EVM/VVPAT amshitsü asoshi awareness agüja liasü. Iba den külemi nüburttem dang EVM/VVPAT amshiba yimyattem sayua liasü.

GPRN/NSCN ajanga asükhu lemsateper

Dimapur, Aenjeti/January 06 (TYO): Anojungi züngsem asem tashi 2023 küm January ita mezüing hopta nung shiranga asüba atema kanga jashir, ta National Socialist Council of Nagalim (NSCN) sangdong ka ajanga ashi.

Shepoumaramth Region kübok Chowainamai Khullen yimtsüing nungi Razou Peyu, Kaisii Pfokehrii aser Shepoumaramth Region kübok Phaibung Khullen yimtsüing nungi Khapur, M. Zao na January 1 aser 2 anogotem asü.

Ano Phom Region nungi Chingmei Phom, Joint Secretary, GPRN ya January 6, 2023 nü asü. Pa ya linük tenzükba wadang nung February 7, 2005 nü tenüing

züluoka liasü.

Par asema pei akokba yari nung linük tenzük asüba ya Naga nungeri tematiba jenjang nung züngshir. Naga lima asoshi parnoki mapa tajung inyakba ya teti bilemtetsü aser parnok tenüingtem Naga nungeri puti otsü nung teti alitsü, ta sangdong ajanga ashi.

NSCN/GPRN ajanga mangyimer kibongtem den asükhu lemsateper. Tulusang Tsüngremi nenok nem temolung nung tesunepsüba aser tashi agüja ta sarasademtsür.

Kaisii Pfokehrii, M. Zao aser Chingmei Phom nungeri tanüla teti tatem maka tesunep nung anisüngzükjang, ta sangdong ajangasa ashi.

PM Modi leniba nung Chief Secretary tem conference kaogo



New Delhi, January 06, 2023: Hokolbarnü New Delhi nung Ato kilonser, Narendra Modi mendenbuba ser Chief Secretaries National Conference agidang tangokba noksa nung angur.

New Delhi, Aenjeti/January 06 (Agencies): Hokolbarnü New Delhi nung Ato kilonser, Narendra Modi mendenbuba ser Chief Secretaries National Conference kaogo; Centre sorkar aser state sorkartem tsüingda amalitepa longjemer inyakba ajanga rongsenkettzüng aintsü nükjidong nung iba senden ayongzük.

Anogo asemnü conference ya Brihostibarnü tenzükka liasü. Iba conference ayongzükba ya sorkartem tsüingda amalitepa inyaksü atema lir; Central Ministries aser department balalai state tem den amalitepa inyaksü aser ibaji India tasenba yangertsü atema kanga nungdakba tongti tongshi ka lir.

Iba mangdangji yur Ato kilonser Modi-i iba conference ayongzük. Iba senden ya mezüing yaküm June ita nung Dharamshala nung ayongzükka agiogo.

Taküm National Conference of Chief Secretaries ya January 5 nü tenzük aser January 7 nü tembangtsü. Central sorkar nungi ketdangsertem, state balala nungi chief secretary tem, States/Union Territories ajak nungi tongti ketdangsertem aser mongintem densema ketdangser 200 dak tema iba conference nung shilem agia dendar, ta Hokolbarnü Prime Minister's Office (PMO)-i sangdong ka ajanga metetdaksü.

India nung tayongzükba balala koktettsü atema Ato kilonseri sorkar tsüingda amalitepa inyaksü atema meranga inyaker. Tesüiba küm 8 tsüingda Modi-i sorkartem amalitepa mapatong balala yanglua benoktsü aser amalitepa inyaksü atema meranga inyakdar.

Ato kilonseri sorkar inyakyim tashi taitba akümtsü aser Centre-state tem tesendaktep tajungba akümtsü atema mera aika agiogo.

2018 küm January ita nung Ato kilonseri Aspirational Districts Program tenzükka liasü, aser iba ya sorkar programmes aser scheme balala ajanga linük tesem balala nung kanga backward district tem tekaraba nung renlokda tsütsü nükjidong nung tenzük.

Aspirational Districts

Programme kübok Central aser State Schemes külemi inyaksü; Centre, State, District Administration, Development Partners aser sensotem amalitepa longjemer inyaksü aser District tem tsüingda tetoktepa alitsü.

Ato kilonser Modi-i PRAGATI tenzük aser iba mapatong ajanga central sorkar nung tongti ketdangser (Secretary), state sorkar (Chief Secretary) aser tanga ketdangsertem Ato kilonser den sabang ka nung longjemdaksür aser ajaki longjemer mapang telatet yur sorkar programmes aser schemes inyaksü meranger.

Iba dak alia Good & Service Tax council ya-a joint forum ka lir, kong centre aser state temi longjemer GST dak sendakba telemtetba ajak agir.

Sorkartem tsüingda longjemer inyakba dak sendakba nung yaküm October ita nung Modi-i state balala nungi Home Minister tem senden 'Chintan Shivir' nung jembia liasü.

Iba dak alia linük nung sorkartem longjemer inyakba ajungkettsütsü atema Modi sorkari mapang shia zonal councils senden ayongzükka amener.

Yaküm September ita nunga Modi-i video conferencing ajanga Ekta Nagar, Gujarat nung National Conference of Environment Ministers senden tenzükka liasü. Iba senden nungji alima tzi-mopung dak sendakba tebilemstü onüktem atema Centre aser state tem longjemer inyaksü atema asalentong yanglua liasü.

Yaküm September ita nunga Modi-i video conferencing ajanga Ahmedabad nung Centre-State Science Conclave

tenzükka liasü. Centre-states tsüingda amalitepa longjemer inyakba ajanga science, technology aser innovation ecosystem ajungkettsütsü asoshi ayongzükba conclave mezüingbubaji ibaji liasü.

Ato kilonser Modi leniba nung India G20 group nung Tir kümogo aser küm piyong linük nung senden aika ayongzükka agitsü. Item senden ya linük tesem balala nung agitsü aser iba mapang nungji alima dang India nunger chiyungtsü aser sobaliba balala sayatsü.

December 9, 2022 nü Ato kilonser mendenbuba ser state balala nungi Governors aser Chief Ministers aser Union Territories nungi Lt Governors den senden mena India G20 Tir dak sendakba onük balala süoka o lempetepo.

MP nung tayimtsü tsükokba lendong nung pilot ka asü aser ka yiru

Bhopal, January 06 (Agencies): Brihostibar ayaterm nung Madhya Pradesh kübok Rewa district nung training agiba tayimtsü ka tsükokba lendong nung pilot ka asü aser training agir pilot ka kanga mejungi yirua Rewa nung aliba Sanjay Gandhi Hospital-i anir ao.

Tayimtsü jagi Hindu nunger tekülem ki ka nung tsükoktsü.

Madhya Pradesh home minister, Narottam Mishra-ia iba tatalokba bushisüingdangtsü tuyuogo.

Rewa district kübok Umri yimdak iba lendong atalok.

Osangbenertem den jembidang Rewa superintendent of police, Navneet Bhasin-i, "Churhata air strip nungi iba tayimtsüji apusoba sülen kilometer ka telongtet nung iba lendong atalok. Aonung 11:30

Uttarakhand CM-i Joshimath nung nisungtem aienshidaksütsü tuyu

New Delhi, January 06 (Agencies): Uttarakhand state kübok Joshimath jila nung ali anenoka aiba mapang Chief Minister, Pushkar Dhama-i lendong aliba tesemtem nungi nisungtem aienshidaksütsü tuyuba den külemi nisungtem jenokdaksütsü atema rehabilitation centres amenoktsü tuyuogo.

Jila nung anentsüh aluba, kiojen aika raksaba aser gari lenmangtem kaksa tenzükba mapang nungi jila nung alirtem aienshidar.

Uttarakhand chief minister-isa ketdangsertem dang disaster department nem iba osang metetdakjang aser tekaraba nung Joshimath nung disaster control room amenokang ta tuyu.

Joshimath nung kiojen aser gari lenmangtem kaksa tenzükba sülen nüburtem tsübuteper; lendong tulu ataloktsüa akok mesüra teti atema iba jila anenoka aitsüa akok ta aikati bilemer.

Osangbener den jembidang disaster management secretary, Ranjit

Sinha-i, tamalen kecha matalokba tesemtem nunga kiojen kaksago, hotel kar mangaogo aser tesem kar nungbo tzi pokteter, ta metetdaksü.

"Ali telunglen nungi tzi adokba nungji lendong keta lir, kechiyong ibaji ajanga ali tazüing adokdaksür aser ali anenoka air. Kiojen asüba ozüing tesashi yanglutsüla. Yangi (jila) kiojen koma yalutsülar sorkari tetuyuba agütsütsüsa akümtsü," ta paisa metetdaksü.

Chief minister-i, "Joshimath nung ali anenzüka aiba aser kiojen kaksaba dak sendakba nung nikongdang Dehradun nung ni tongti ketdangsertem den senden ka ayongzükka amentsü. Asüing ni Joshimath semdanga tensa asadangtsü. BJP-ia team ka Joshimath-i yokogo," ta metetdaksü.

Uttarakhand nung Chamoli district kübok Joshimath jila ya süklep 6,000 tema nung lir aser iba jila ya high-risk seismic 'Zone-V' kübok lir. Tang tashi nung jila tesem balala nung ki 561 kaksago.

MP nung tayimtsü tsükokba lendong nung pilot ka asü aser ka yiru

ako aser 11:00 ako tsüingda tayimtsü tsükokba lendong nung training agütsür pilot Captain Vimal Kumar (50) asü aser training agir, Sonu Yadav (22) yiru," ta metetdaksü.

Pilot Kumar ji Bihar yimtiba, Patna nungi liasü aser Yadav ji Rajasthan kübok Jaipur nungi.

Police-i ashiba agi, nisung ana mentetba tayimtsüji Falcon Training Academy meyong lir aser iba tayimtsüji 2020 küm March ita nungi amshia liasü.

Iba lendong atalokba sülen District collector, Manoj Pushp aser district SP, Navneet Bhasin na lendong atalokba tesem jagi ilonga oa liasü.

Osang angazükba agi, lendong atalokba tongti kuliji mepet-tzüsü aliba ajanga liasü. Tayimtsü jagi mezüing electric inzü nung kongshi, iba sülen tekülem kidangji tsükoktsü.

GOVERNMENT OF NAGALAND PERSONNEL AND ADMINISTRATIVE REFORMS DEPARTMENT (ADMINISTRATIVE REFORMS BRANCH) NAGALAND: KOHIMA OFFICE MEMORANDUM Dated: Kohima, the 8th December, 2022 No.AR-3/GEN-380/2020: In pursuance of the Cabinet decision vide CAB-2/2013 dated 29.11.2022, the Governor of Nagaland is pleased to include Sumis of Sukiur village under Shamator district within the 2% Job reservation given to Sumis of Kiphire for all purpose of the public employment with immediate effect. Sd/- J.ALAM, IAS Chief Secretary to the Government of Nagaland.

Form No. 3 [See Regulation-15(1)(a)]/ 16(3) DEBTS RECOVERY TRIBUNAL GUWAHATI Suwarna Bhawan, House No. 12, New Town Path, Near Hanuman Mandir, G. S. Road, Ulubari, Guwahati-781007 (Assam) Case No.: OA/61/2022 Iba Act nung section 19 kübok sub-section (4), Debt Recovery Tribunal (Procedure) Rules, 1993 nung Rule 5 kübok sub-rule (2A) den züingang. Exh. No.: 2627 INDIAN BANK -Vs- MR WATIMOA To, (1) MR WATIMOA S/o Mr. Aosadang, R/o - Vill - House No. 77, Asangma, Tuli, P.O. MokochechungMokokchung, Nagaland-798601. JAOKER 15.12.2022 nü Hon'ble Presiding Officer/ Registrar matsüingdang OA/61/2022 benoka liasü. Iba Act kübok section 19(4) nung ajemdaker sentsüh Rs. 32,23,535.17- atema na anema (OA) benokba nung ajemdaker iba Tribunal-i jaoker/notice agütsür (application den documents inoksema lir). Iba Act nung section 19 kübok sub-section (4) nung ajemdaker na aser na pusemertem nem teküboklen alibatem tetuyuba agütsür:- (i) Relief meshibaji kechiba grant masütsülar anogo semer tsüingda kuli agüjang; (ii) Applicant-i original application nung serial number 3A kübok shia aliba kiojen aser osettsüset dak alaka tanga kiojen mesüra osettsüset sangdongang; (iii) Original application nung serial number 3A kübok shia aliba kiojen mesüra tanga osettsüset ayoktsü memelar; (iv) Tribunal dang nungi jelia temelaba memeshii original application nung serial number 3A kübok shia aliba kiojen mesüra osettsüsettemji security interest atema inyakba dak alaka ayoktsü, lease asütsü memelar; (v) Ordinary business nung item kiojen mesüra osettsüset yokzükba senji nai item ama kiojen atema security interest aliba bank mesüra financial institutions indang account nung deposit sütsütsü. Nü dang tezüluba nung statement agütsütsü aser copy ka applicant nem agütsütsü tuyur aser 30.01.2023 nü anepdang 10:30 ako nung Presiding Officer matsüingdang arutsü tuyur. Ajimesüra application ji agadangtsü aser na meliaka telemtetba agitsü. Iba anogo 20.12.2022 nung kü meyongnem aser Tribunal indang seal ajenoktsür. Registrar, Debts Recovery Tribunal, Guwahati



TIR YIMYIM YIMOBILEM (EDITORIAL)

DIMAPUR KÜPTOKNÜ, AENJETI 07, 2023

Solution masü Election osang

Küm pongo jakdang Nagaland nung nübortemi election maginü asü saka BJP teloki Naga yimten tebilemstü ya tatem küma latettsü asoshi election agitsüla ta Naga nung mesüzüktet, anungji BJP teloki agütsüba yimyim " Election for Solution" sülen anidaka election agiogo aser metsütsüi BJP aser NDPP telok na telongjemi government akümtsüsa takok nguogo. Ajisüaka, election agiba sülen, BJP teloki ayimba yimyim "Election for Solution" mapa küma inyaksü atema merangdangba senntongbo kecha inyaka mangu. Mapang mapang shia Naga nung yimten nüchiso bushir teloktem den yimjung mapang atsülangshitsü aser Naga nung yimten nüchiso bushirtemji yimjung nung ayongayonga pei kidang lidaktsütsü ta asüba dak alaka center government dak Naga yimten tebilemstü ya teti atema latettsü atema tangatetba alibabo mangur. Aji oda, tesasatsüka, mapang tera atsülangli Naga nung yimten nüchiso bushitsü atema telok tasen ka tentelli ta, tanga NSCN (khang) telok nung mepetmesü adoker lia Amit Shah arubaji Naga nung ajak asoshi tia maka asütsü. Atangji, taoba ita nung India kilo kilonser Amit Shah Nagaland-i arutsüba osang angazük dangbo, pa ya tanga kecha atema masü saka Nagaland anüdoklen alirtemi Frontier Nagaland state balaka akümtsü akangba onük dak aketba maparen indang reprangtsü aser jembitsü asoshi arutsü amai angatet, saka yashi pa arur Dimapur nung jembidangbo iba onükjibo tilakata mesüok saka taoba küm ter tsüngda Nagaland nem center nung BJP government-i terenlok mapa inyaksü atema sen tali-tali agüja aruba indang kanga züngzünga shiogo. Ibaji dang masü saka Nagaland nung National Highways yangluba , kibong shia pipe agi tzü tajemtsü tongtsüba aser Covid mapang nunga ita nung nisung shia nem jang seret pongongo agüja yariba indang "progressive report" agütsür amai kanga jangjaa agütsüogo. Tangari masü saka tagütsüri tonga aruagi ashir asünungji, asenoki pa dang kanga pelar ta ashitsüba dak alaka kecha mali. Ajisüaka, pelar ta shinüaka meshitet pa meyipa odaktsür asütsü, kechiyong Amit Shah-i agütsüba 'progress report' o asen lima renlokba jenjang na meputeper. Atangji, pai nangzüker asünungji, Frontier Nagaland dak aketba ken o nunga pai nübortem nungdak angateta inyaksütsü imlar. Ajisüaka, pa o nung angatetba agi, Nagaland nung taküm küm February aser March nung agitsüba election yabo methitemi agitsüa akok. Aji oda, election agira, tang election nunga BJP telok yimyimji ' Election for Solution' asütsü asü (?) mesüra ' Election is Solution' asütsü ? Atangji, Naga nung asoshi election-a sang Solution-a sang kecha mali, sen angur mangur ta dang, anungji tangatetbalen masü saka takoklen aotsü. Aji oda, India nung yimten teloktem rongnung kari khen kokli, kari khen kokli ta asüdang, Naga nung takoklen dang arishia arishi ajak tembanger asütsü. Ajisüaka, taküm tatem nungbo, parnokbo takoklen dang dena arua ta asüba dang nungibo, parnokbo teti tangatetbalen dang dena arua ta asüba dang tanü dang masü saka asüng Naga nung chimurtem asoshi tagitsü senmang asütsü. Atangji, tebok asüngtsü atema amtsük ya tongtibang saka amtsük kija agibo asenok taküm melitettsü. Amtsük kija agi taküm litetter asübo, taküm piyong shitaklen nungia aser mashilen nungia amtsük bendena ayurtem toang tamakok aser tesama mengui tang tashi nokdaka lila ! Aji oda, Naga nungertem ya ochishir kin süra asenokbo takoklena masü aser amtsük angulena masü saka shitaklen aser tangatetbalen aotsüla. Iba jagi dang, India küboksa süaka Nagaland mera akettsü aser Delhi nung Naga nungertem nümadanga senzütsü. Asenok kija asüyonga ochi aser tangatetba nung nokdakra, asüngbo ajak yangji adenshitsu. Kechisarina tajung shia jenjang kaka lir, iba jenjangji timtem, tamakok, maksü aser sensak tia asütsüa akok, ajisüaka asenoki khen arema item jenjangji agütsütetra, takokji asenok meyong asütsü. Atangji, Naga nungertem election agitsübo renema mali, kechiyong solution aginür. Ajisüaka, Naga nungertem solution atema election nung peisasa shilem magitsü akangakanga mulungteter inyak ka mesüra, akhi ama election-bosa agitsüsa akümtsü aser Indian election-ji kodanga Naga-solution masütsü.

OLEMSABANG

Tenyartem shirnok Osangtajung sangdongtsü Khristai shimtet (Parnok indang tatsü agi (Headline) ama dang agütsür)

Y. Imti Tzüdir, Dimapur

Sl.No	Tenüing aser iba tetezü	Tenüing aser koba tesem nung	Tsürabur tenüing	Lemzüksüba mapa	Asüba
1	Simon Peter Greek o nung 'Petros' tetezü 'lung' (rock). Yisui Peter tenüing Cephas 'stone' Aramic oshi nung agütsü.	Pa angopur. Bethsaida nung ali.	Yona	Asemben tashi Yisu menangzük. (1 st & 2 nd Peter pai zülü)	Nero chubai 64 AD nung pa kangki nung langkoshishia angenlok.
2	Andria (Greek o 'andreas' nungi ibai agizük. 'Andreios' tetezü 'teburji' Pa Peter tenu liasü.			Mezüngbo pa Yohan nütsüing liasü. Mk. 1:17	Greek Yimti Patras nung Tepset (60AD)
3	Yakob (English nung James) Ibri o 'Ya aqov' koba Tejen Lai nung Yakob nungi agizük. (Zebedi chir Yakob).	Galil nung angopur liasü.	Zebedi	Yisu nütsüing asem rongnung tongtibang ka Yakob liasü.	Herod Chubai pa nok agi lepset. (T.Mapa 12:2)
4	Yohan (Pa Yakob tenu). Ibai Ibri o 'yochanan' tetezü 'Yahweh is Gracious' Yehovaji taochi. (Pa Patmos Asetkong nung alidang Jungkai Adokba kaket pai zülü.	Yisui tedi tena dang tsüngmok chirtem ta aja. (Mk. 3:17)		Pai Lai kaket 5 zülü. Itemji: Yohan, YohanI, II, III aser J. Adokba.	Pai Efesa nung sayutsüngi asü. Patmos assetkongi aritok aser Efesai meyipa aru. Tambur kümer 98 AD nung asü.
5	Filip -- Greek nung tenüing 'philippos' koba tetezü, 'Kor Tembar'	Bethsaida. (Galil Tzüyim anasa)		Pai Nathaniel nem Yisu agizükdaktsü.	Pa kangki nung langkoshishia angenlok.
6	Bartholomew 'bartholomaios' nungi agizükba; koba tetezü 'TALMAI-er jabaso'.	Kana (Nathaniel)	Tebu tenüing Thalmai.	Pa Filip tembar liasü.	Paa kangki nung angenloka südaktsü.
7	Mathi. Greek oshi 'mathaios' Aser Ibri nung tenüing 'mattiyahu' tetezü 'Yihuba sempet'. (Gift of Yahweh)	Pa Kapernaum nung alimelen sarur ka liasü. Pa tenüing Levi.	Tebu tenüing Alpha.	Mathi kaket Pai zülü.	Nü agi tsüngset.
8	Thadia (Mtt. 10:3; Mk. 3:18) Ibri o nung 'yehudah' tetezü 'Tenüing asangba'		Tebu tenüing Alfa (Mk.3:18)	Yihuda (Jude) kaket pai zülü.	Lung agi onset.
9	Toma (Chakrep chir) Aramic oshi nung "Ta' Oma", koba tetezü chakrep chir.	English Bible nungbo pa tenüing Didymus	Yohan: 11:16; 20:24; 21:2: Didymus		Pa Mylapore nung nü agi tsüngset.
10	Zealot ta ajaba Simon. Ibri o nung "Shim'on" koba tetezü "pai angashiogo" Zealot: Lk.6:15; T.Mapa 1:13	Kanan nungur		Ijip nung pai sayutsüngi.	Mylapore, India nung pa kangki nung angenlok.
11	Alf chir Yakob (tanubu) (Mathi 10:3; T.Mapa 1:13)		Tebu Alfa		Yirusalem nung lung agi onset.
12	Yihuda Iskariot (Mat. 10:4; Mk.3:19)	Iskariot.		Sen 30 yong pai Yisu ashioaktsü.	Pa sasa soseta asü.
13	Mathia (T.Mapa 1:23, 26)			Yihuda Iskariot melena Mathia shim.	Lung agi onset.

Süngmok süngo ajemba tajangzük



1. Ovarian cancer anepaludang amshir.
2. Colon cancer noktanger.
3. Anepdang shirangba jungdaktsür.
4. Motion sickness yarir.
5. Tashitsü atuba aser awakba süneptsür.
6. Tepinpang ashiba süngjemtsür.
7. Migraine jungdaktsür.
8. Tetsürtem azü aodang tashitsü atuba anentsür.
9. Yimra-wara nungi kümzüker.

Source : Internet

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

WCC-i Russian Orthodox Arogo agientsüla: Elisabeth Braw



2014 küm July 18 nü Moscow region nung Russia Tir, Vladimir Putin (abelen) aser Russian Orthodox Arogo tongti Patriarch Kirill nati Trinity Lavra monastery semdangba mapang tangokba noksa nung angur.

January 06, 2023: Foreign policy tsütsü mongin kati World Council of Churches (WCC) dang Russian Orthodox Arogoi Russia-i Ukraine amakba pusemba atema WCC nungi züngsem agientsüla, ta ayongzükogo.

Elisabeth Braw ya kaketzülur ka aser American Enterprise Institute nung national security teblemetsü onüktem atema inyaker ka.

Mongolbarnü lai Center for European Policy Analysis atema zülutsüba ocet "In the Name of God, Go" adoka liasü.

Braw-i, WCC ya "United Nations of global Christianity" amai lir, anungji Patriarch Kirill-i Russia-i Ukraine linük amakba pusemba atema WCC-i Russian Orthodox Arogo ya WCC züngsem nungi agientsüla, ta ashi.

"Khristan ajaki mapang shia tatok meshir aser Khristan shinga tetemsü mali. WCC tangatetbatemji- tamang nung telongjem, mission aser osangtajung prokba, meimchir tenzükba, nüburtem tsüngda tetsükdakba agientsüba aser yimjung atema inyakba lir, ajisüaka Russian Orthodox Arogo nung lenirtemi item Khristan tangatetbatemji sendoker," ta lai ashi.

Braw-i, "Kirill-i par Arogo kümzüksü atema Kremlin den tesendaktep tajung ayutsü akok, ajisüaka pai yimjak nung rara pusemba yabo tera tali," ta metetdaksü.

"WCC-i itemji atangji nangzüksüla aser Russian Orthodox Arogo züngsem agientsüla. WCC aser alima nung Khristan yimsü mezüngmeshiba den rara sapuba organization ka WCC nung züngsem asütsü metemtsü," ta lai ashi.

WCC ya 1948 küm tenteta liasü aser iba tentet nung züngsemtemji denominations 350 nungi lir aser züngsem ajak senteper Khristan million 500 dak tema lir.

WCC lenirtemia Russia-i Ukraine nung rara ayongzükba atema aiben aija arudar.

"Alima tesem balala nungi Khristantemi tangsa rara anentsü aser teti yimjung alitsü atema ken o jembitsü ayongzüker," ta lai ashi.

"Iba denji külemi onoki central committee-i ayongzükba lephsia Russia aser Ukraine naprongla nung Khristantem aser Arogotem dang Ukraine nung nisung maneni tepsetba, kiojen raksatsüba aser nisung jenshidaksüba ya aijang ta mepishir," ta lai metetdaksü.

Yaküm October ita nung WCC Acting General Secretary, Fr. Ioan Sauca leniba nung telok kati Russia Orthodox Arogo nung tongti, Patriarch Kirill ajurua Russia-i Ukraine amakba atema jembia liasü.

Iba mapang nungji Sauca-i, "Onoki maneni tensa mita alitsü

aser sarasademba den külemi ken o maneni jembitsü. Onoki Arogo tesendaktep, yimjung yangerba, sangdong agütsüba aser tongtepratep ajanga amalitepa inyakdar," ta metetdaksa liasü.

"Arogotemi maneni yimjung atema inyaksü aser Ukraine aser alima tesem balala nung rara anentsü atema sarasademtsütsü ni imlar," ta Sauca-i metetdaksü.

Russia-i Ukraine amakba Kirill-i pusemba atema tanga Orthodox Arogotem aser organizations balalai pa aitsüogo.

Yaküm March ita nunga Orthodox Public Affairs Committee ka aser Ukraine nung tongti putiria Russian Orthodox Arogo nung lenirtem anema tenokdangba agütsütsü mepishia liasü aser June ita nung United Kingdom-i Kirill anema tenokdangba kar sangdong.

ANOGO ABEN TSÜNGREM DEN

Tepela Tanela

- Yohan 14: 16-26

Tanela Temeshiji asenok süneptsür aser Teyarir asütsü asoshi Tsüngremi ajemalu posü ama yok. Pa mejashidaksütsü saka peladaksütsü asoshi tanü asenoki mapa terok shisadangdi.

Tanela Temeshiji teshisadang akaba Tanela lir (Isa 11:2). Asenok nükdang junger ta bilemba lemang karibo asenok tesamadaki anir (A.Shin 14:12). Tanela Temeshi-i tetenzük nungi tatembang metet nung Pai asenok Tsüngremi mulungba teyong alitsü yarir aser Pa peladaksüba lemang nung asenoki anir. Asenoki temulungjang ajunga agi Tsüngremi mulungbaji agizüksüla iba jagi Tanela Temeshi peladaksür.

Tanela Temeshiji "Tasen Tezüngzüktepba" Tanela lir (2 Kor. 3:6). Pai asenok Tejen Lai ozüng talenba nungi kümzük. Kodang asenoki ozüng nung tesülen shitsür aser Tanela Temeshi agütsüba nüji nung lidir iba jagi Tanela Temeshi peladaksür.

Tanela Temeshiji "Tashi" Tanela lir (Zek. 4:6; Lk. 24:48; 1 Kor. 2:3,4). Kodang asenoki asen tashi, temetetba aser rongsen nung temulung melemi Tanela Temeshi teyari bushidir, Pa pelar.

Tanela Temeshiji "Khrista" Tanela lir (1 Peter 1:10-12; J. Adok 1:9,10). Asenoki kodang tarendakba mesüra akmesen meli-i Khrista indang kuli südir Pa pelar. Tanela mapaji Khrista sentsüwangshidaksütsüba lir (Yn. 16:14).

Tanela Temeshiji "Kotaker Tebu" Tanela lir (Isa. 63:8-10). Kodang asenoki Tsüngrem asenok "Abba" ta agizükdir Pa pelar. Tanela Temeshiji "Kotaker sentsüwangshi" Tanela lir (1 Peter 4:12-16). Iba lima nung shinga timtem nungi jenbua mali. Tanela Temeshi-i asenok timtem ken agi melentsür. Tanela agi sünga alibaji asenok asoshi temoatsü aser Pa asoshi tepela lir!

Tejashitsüji ya, kodang asenoki Pa jashidaksüra Pai asenok metoktsür. Saka asenoki Pa maneni jashidaksüra Pa "remseper!" (1 Tesa. 5:19). Tsüngrem tesülen aliba ser asenok mulungjang nung Pa mokorai alibaji bilemdangang!

Oh! Taküm Tsüngrem Tanela, Na tesangwa aser mi Tsüngrem lir. Jangruang, mi tashikang jangruang Onok tepang mechitem temeim aser tejangraba milak agi süngjang.

Ajak dang Ne osangtajung sayutsü Tsüngremer sentsüwangshi arok rongsen.

Uganda linük nung pastor ka den Khristan ana miim chidaksü

Nairobi (Kenya), January 06 (Agencies): Yaküm November ita nung anüolen Uganda nung Islam yimsü alia amangertemi pastor ka den Khristan apuani nem kangshia miim chidaksüba sülen pastor bo hospital Intensive Care Unit (ICU) nung tang tashi mongdar.

Yaküm November 24 nü arrshi küm 51, pastor Francis Kutekereza-i Khristan apuani na den sarasadem agiba mapang nung Muslim nung kar kidangi arua liasü.

Kigoroby Sub-County, Hoima District nung Khristan apuani jagi Islam yimsü toktsüba sülen Khristan yimsü agizükba agi Muslim nungertemji jashia liasü.

Muslim nung tenet pastor kidangi aruba sülen parnok nem kangshia somomo chidaksü. Somomaji mesen südaksüba mozü nung soa par asem nem kangshia chidaksüba ajanga parnok miim chisema liasü.

Osangbener den jembidang arrshi küm 27 kinümbu jagi, "Nisung asemi pastor soit aser

nisung pezüi kinüngtsü küna tekong nung soitba sülen onok nem kangshia somomo chidaksü. Künabo jena otet saka pastor bo jena moutet," ta metetdaksü.

Iba sülen parnok jagi pastor dak züker jena ao.

Ghonda asem tsüngda Pastor Kutekereza saaksü, tebok nung tashitsü atu aser tebok ao. Ghonda pongu sülen apuani najia kasa yimya nung timtema liasü.

Apuani naji Kigoroby health clinic nung hopta asem amongba sülen December 14, 2022 nü kidangi meyipa yok saka pastor bo tang tashi ICU nung lir.

"Pastor tang tashi hospital yipten nung lir. Pa tebok, tetsüng aser tejak awakba ajanga pai junga mejajateter aser tenük agi junga mangur," ta osangbener kati ashi.

Pastor Kutekereza ya tanur pongu tebu aser par chirnurtemji arrshi küm 17 nungi 28 tsüngdapurtem lir. Pa treatment tajungba agitsü atema medical equipment junga aliba hospital

kati anir aotsüsa akümer.

Pastor-i apuani naji aiben semdanga sayutsüngiba sülen October ita nung apuani jagi Khrista agizüka liasü, ibaji ajanga Muslim nung jashidaksü.

Kinümbu jagi, "Pastor Kutekereza ajurua aruba sülen October 20 nü künati Issa [Yisu] sülen anidaksü telemtetba agia liasü. Iba sülenjia pastor-i küna den Brihostibar aonung shia sarasadem sentong agi. Pastor-i mapang shia küna semdangba ajanga kiyonger Muslim nungeri onok den metetpelaa liasü, ajisüaka künati parnok dang pastor ji business partner ka dang, ta shia liasü," ta metetdaksü.

"November 10 aonung 7:30 ako meta Muslim nungeri ka par kidangi aruba mapang nung pastor-i Laishiba pa indang yangkhu nung inokbaji angu. Pastor kidang nungi aoba sülen pai kinüngtsü küna dang Laishiba indangji asüngdang, saka künati ola madok," ta pai ashi.

November 17 nü pastor-i pa dang phone nung text message ajanga pa amokmerenba sayu, aser text ka nungbo yamai zülua liasü, "Nai par ki semdangba nükjidongji onoki metetogo. Iba ya business atema masü saka Khristan yimsü agizükdaksütsü atema lir. Tangsa iba ya anenang ta nü dang tekümdangtsü metetdaksü."

Arogo lenir kati, Khristan apuani naji tanga tesemi moura tenati lendong ajurutsüa akok, ta ashi. Paisa, pastor-i hospital bill agütsütsü atema teyari nüngdaksü, ta ashi.

Uganda linük temzüng aser tanga ozüngtem ajanga tamangba yimsü ajak nem temeden agütsür; pei yimsü tangar den lemsateptsü aser tamangba yimsü melentsü atema temeden agütsür.

Uganda nung Muslim nütsüngbo shilem 12 shi dang lir aser parnok teimbaka linük anüdoklen alir. Nütsüngtajemba süaka Muslim nungeri mapang shia Khristantem anema inyaker.

US House Speaker atema anogo pezünü buba vote agiteper

Washington, Aenjeti/ January 06 (Agencies): US House of Representatives züngsem temi Hokulbarnü agi pezünü buba Speaker ka shimtsü asoshi vote agütsüteptsü.

Iba menden asoshi yakbang sür toktepsang Republican Kevin McCarthy yagi election asoshi vote 218 nüngdaka aliba monguteti arur.

Ibaji talisa par party nung right-wing telok kati pa nem vote agütsütsü memolungba ajanga lir.

Tang tashinung vote 11 ben agüja lir aser yangji meja-meja takok angur ka maliba ajanga sorkar tasü ama lir, koba Civil War atongtsü mapang sülenbo mongudangi liasü.

Speaker asoshi tokteptsü atema McCarthy-i Republican telok nungi pa nem vote agütsütsü memolungba züngsem 20 rongnungi 16 anir arutettsüla.

Parnok anir arutsü atema pai lenla balala nung atsü-anem akatsü asoshi anogo ka dak tali jembia arur.

Pai parnokji kar mesüzüktetra dangartemi metokteptsü ta pa teimla lir.

Terenlok kanga meilongi lir, aser McCarthy bukumer kar temolung nung anisüngzük makai akumer.

McCarthy yagi House nung Speaker indang shilem tashi ajema akumtsüsa atsü-anem akatsü maongka agüka lir, saka itemji ajanga parnok anir maruteter.

Vice President Kamala Harris sülen tir akumtsü asoshi House nung Speaker ya lir. Parnoki House nung agenda benoker aser parnok medeni legislative business kata magiteter.

Speaker mali House nung maparen kecha meinyakteter, züngsemtem tezüngzüktep magiteter aser bill tem magizüker.

Taoba Tir Donald Trump-ia busemaka 'Never-Kevins' nüngja agüja aliba telok yagi McCarthy dak temolung machir.

Parnok vote ya kanga tongtipang lir, kechiaser züngsem 435 aliba chamber atema November ita midterm elections agiba nung Republicans temi kanga apoa menden 222 dang nguteta lir.

Ajisüaka tang tashi

tangatetep kati arutsü lenmang mesayur.

Iba telok nungi Congressman Matt Gaetz-i Brehostibar aonung osangbener dang ashiba agi, Kevin McCarthy speaker akumtsüsa jembishinüba ken o kecha nunga pai bukuma menokdaksü.

House khen asoshi anena atatsü lia Brehostibarnü tesüsa vote agütsüteptsü nung McCarthy-i vote 200 angu, Byron Donalds dangi Republican vote 12 ao aser Kevin Hern dangi vote tenet ao.

1860 masüdag United States union nung alar asoshi atsütepa arudang Speaker ka shimtsü asoshi Congress nung aiben vote agütsüteptsü meliasü. Iba mapang vote 44 ben agütsü.

Külen nübu tajemba Democrats temi maneni par lenir New York nungi Hakeem Jeffries nem telungjem nung vote agütsür, shiba Congress nung party ka aniba sentsü tanak nisung mezüngbuba alitsü. Ajisüaka pa Speaker akumtsü asoshi Republican züngsem trok ya ani marutettsü amai ajiteter.

Afghanistan aser China nunger company tsüngta totzü atsütsü zülutep

Kabul, Aenjeti/January 06 (Agencies): Afghanistan nung Taliban-i aniba administration ajanga China nunger company ka den Amu Darya basin nungi totzü atsütsü aser linük northern tsütsü Sar-e Pul province nung oil reserve yanglutsü atema contract ka zülutepogo.

Iba contract ya Brehostibarnü acting Minister of Mines and Petroleum Sheikh Shahabuddin Delawar aser Xinjiang Central Asia Petroleum and Gas Co (CAPEIC) nungi ketdangsür ka tsüngta Afghanistan yimtiba, Kabul nung sentong ka agia zülutepa liasü.

2021 küm yimten tashi rakzükba sülen bendanger company ka den Taliban administration-i ali rongsen agitettsü asoshi tezüngzüktep tulu agiba ibai mezüngbuba alitsü.

Iba sentong nung acting Deputy Prime Minister Mullah Abdul Ghani Baradar aser Chinese ambassador to Afghanistan Wang Yu na dena liasü, ta sorkar meyong Bakhtar News Agency ajanga ashi.

"Tawa Economic Commission ajanga project kar agizükogo aser parnok anir maparen tenzükba ajanga linük nung yimchiyimjungi aser nübör ajanzüktsü asoshi tongtipang mera tem agitsü," ta Baradar-i ashi.

"Sar-e Pul nung aliba nübörtemi jangraba ama aser

international standards nung mela aliba ama company-i maneni inyaksangshitsü onoki ajungshir," ta pai ashi.

Iba sentong nung jembidang Delawar-i ashiba agi, iba tezüngzüktep kübok China nunger company yagi northern Sar-e Pul, Jawzjan, aser Faryab provinces nung meyokteper square kilometre 4,500 nungi totzü atsütsü.

"Iba project nung yangji alir nisung 3,000 dak tema mapa angutsü," ta pai ashi.

Chinese envoy-i iba tezüngzüktep ya rara agi raksatsür aliba linük rongsenketzüng aintsü atema tongtipang lir ta ashi aser Kabul o Beijing tsüngta tesendaktep tajungba akumtsü asoshi mera tajung ka lir.

"Amu Darya oil contract ya China aser Afghanistan tsüngta tongtipang project ka lir," ta Wang Yu-i ashi.

Iba contract kübok CAPEIC-i Afghanistan nung küm ka nung sen million \$150 indoktsü, ta Taliban meyong administration asoshi odongtar Zabihullah Mujahid-i Twitter nung ashi.

Küm 25 asoshi zülutepba contract atema küm asem nung sen indokba ya million \$540 akumtsü, ta pai ashi.

Iba project nung Taliban administration partnership shilem 20 alitsü aser ibaji shilem 75 tashi kumtettsü, ta pai ashi.

Faryab aser Sar-e Pul nung aliba Amu Darya basin nungi

total agitettsü asoshi sorkar meyong China National Petroleum Corp (CNPC) ajanga taoba mapang United States-i busemba sorkar den 2012 küm contract ka zülutepa liasü.

Iba mapang Amu Darya nung totzü tazü barrel million 87 shi lir ta asadangteta liasü. Iba totzü ya Afghanistan nung yanglutsü, ta Delawar-i ashi.

Taoba sorkar laoba sülen China nunger company ka totzü atsüba anen, anungji CAPEIC den tezüngzüktep ya yanglu, ta Baradar-i Brehostibarnü osangbener senden nung shia liasü.

Afghanistan nung ali rongsen tazü ya sen trillion \$1 dak tema indang lir ta asadangteta lir aser iba yongji bendanger kari senotsü indoka itemji agitettsü jangrar.

Ano China sorkar meyong company kati Taliban-i aniba administration den eastern Logar province nungi copper agitettsü asoshi jembishinür, koba taoba sorkar kübok zülutepa liasü.

China-i Taliban administration agizükba sangdonga mali saka par Belt and Road infrastructure initiative nung iba linük ya tongtipang ka akumer aser temolung agütsür.

Afghanistan nung ISIL (ISIS) teloki China nunger dak tenük yokaka iba totsü contract yagi region nung China indang rongsenketzüng nung shilem agiba sayur.

Menungra Bilemteter

Temeim asür Noklemsama



07.01.2022 - 07.01.2023

Küm ka tejaklen iba anogo nai onok toktsür tatem makaba tepela limai aoba onok asoshi tamang anogo. Tanü iba anogo nung onoki ne temeim akhüm tajung aser temoatsütem bilemteta Tsüngrem nem tenüngsang agüja amonger.

Temeim kinungtsü, chirmur aser kinungertem

MOLUNGNEN O



ASUR MRS. ANAPULA LONGKUMTSUR (YAONGYIMSEN) CHUMUKEDIMA
1928 - 30/12/2022

"Ne taremsük shisatsü onok asoshi temoatsü"

Onoki teti meima aliba tsürapur asür Anapula Lkr, iba akümlü wadang tempanger onok mangyim jashi tia nung alidang kija, kibong, medemsor, arogotem aser lokti balala shirnokisa ozü mangyim nung nübo, rongsen, temeim aser sarasadem agi yaritepogo, nenok ajak dang kanga pelaba lemsateper.

Asen teyanglur Tsüngremi nenok ajak moajang ta ozü tamang sarasadem.

Temeim Chirnurtem, Semchirsemmur aser Kinungertem.

12 Buba Zünga Chungtia-i TENÜNGSANG AGÜTSÜR

Shri. A. Nokchasashi NCS S/o Mr & Mrs. Arimapang (Chungtia), Nagaland Sorkar tenzükba nung Deputy Commissioner (Tuensang) jenjang tongtetba asoshi khonang aser tetushi tulu agütsür.

Tarutsü nung pa mapa aser wadang tali azükaru südakjang ta züngapur sarasadem.

Tsüngremi na aser ner kibong tali moajang.

Züngapur tenüng nung,

Sd/- Mr. Toshilemba Ajem **Sd/-** Mr. Imtimongba
President **Secretary**

8 BUBA Tuli Marathon, Tug of War & Cake Rally Race

8 buba Tuli Marathon, Tug of War & Cake Rally Race aruya aliba January 21, 2023 anepdang 5:00 ako nungi tenzüktsü.

Taoba 2015 küm nungi tenzükba District Administration Tuli Division-i ayongzükba, Tuli Ward Union, Tzüdikong Adhoc Town Committee, Watsü Telen aser Ao Students'Union Tuli / Tzüdikong longjemer iba sentong agiyonga arur.

Marathon Race (Both Ladies & Gents) (Prize with Certificate)

- 1st Prize : Rs. 10,000/-
- 2nd Prize : Rs. 7,000/-
- 3rd Prize : Rs. 5,000/-

Tug of War

- 1st Prize : Rs. 10,000/-
- 2nd Prize : Rs. 7,000/-

Cake Rally Race (Group wise)
Tuli & Tzüdikong nungi team 16 tokteptsü.

Iba sentong nung Wb. Shaying Sheu, ADC Tuli lenisüba kübok agitsü aser takoker sempetji January 26, 2023 Republic Day sentong nung agütsütsü.

Anungji taruner ajaki iba nung shilem agitsü Organizing committee ajanga ayongzükur.

Sd/-
IMTINUNGKUM
Organizing Committee.

Italy nunger football asayar tejen Gianluca Vialli süogo



Rome, Aenjeti/January 06 (Agencies): Taoba mapang Italy nungi football asayar nungtugu, Gianluca Vialli, cancer agi shiranga arishi kum 58 nung süogo.

Pa asüba ya Hokulbarnü taoba mapang pa asayaba Sampdoria club ajanga sangdonga liasü.

Vialli ya 1964 kum Cremona yimti nung aso aser Italian club Sampdoria aser Juventus aser English club Chelsea nung asayar Italy asoshia 59 ben asaya liasü.

Pa dak 2017 kum mezüngbuba pancreatic cancer putet saka kum ka lir iba tashidak samaogo ta sangdonga liasü, saka iba tashidak meyipa shilang.

March ita Netflix documentary ka sayuba nung

Vialli-i cancer ya "travel companion" ka lir aser iba yagi pa tesunep nung yutsüsü imlar, ta shia liasü.

"Shirangba ajanga ni kechi arr ibaji aika sayur," ta pai shia liasü.

Tashidak liaka Italy-i Euro 2020 asayamung akokba nunga shilem tulu agia Sampdoria nung mapang talangka nungi külemi asaya arusang aser national coach Roberto Mancini den yaritepa liasü.

Vialli aser Mancini nati anir Italy nunger 2021 kum iba asayamung nung shilem agia Wembley Stadium nung takok marok ajungket, kong kum 29 jakdang par Sampdoria teloki European Cup final nung Barcelona mokokteti liasü.

Parnok nüktzü yima benjongtep aser ibaji ni pa dangi

ball yoka pai goal agütsü dang azüitba dang nungi tebour tajungba liasü, ta Vialli-i November ita Italy indang RAI TV nung ashi.

Taoba ita Vialli ya Italian national team nung head of delegation shilem yutsüsü akum aser pai tashidak phase tasenba ajangtetsü atema rangloktü nungdaker, ta shia liasü.

"Ni tain akumba agibo masütsü ta ni meteta lir, ni akok tashi talangka alitsü imlar, saka tesüiba mapang dang nungi tamajungba amai bilemer," ta pai documentary nung shia liasü.

Vialli ya Sampdoria nung season ti tashi asayadang Serie A title aser European Cup Winners' Cup nungertem koktet aser iba sülen 1992 kum Juventus nung otsü yanglua sen euro million 16.5 agi oa aden.

Pa Juventus nungi asayadang parnoki Champions League akok aser 1996 kum Chelsea dangi oa 1998 kum player-manager akum.

Vialli-i season tatemlen mapa nungi anentsür alisang Ruud Gullit nungi mapa agizük aser pa leisüba kübok Chelsea-i League Cup, UEFA Cup Winners' Cup aser UEFA Super Cup nung takok ngua liasü.

Pai 2000 kum FA Cup final-i Chelsea anir tua takok angu saka iba sülen pa mapa nungi anentsü.

Cristiano Ronaldo ya Al Nassr nunga asaya ana nokdangtsü

Riyadh, Aenjeti/January 06 (Agencies): Portugal nunger football asayar mongin Cristiano Ronaldo ya Al Nassr nung mezüng masayadang English Football Association ajanga asaya ana nokdangtsü temerenshi agütsüba inyaktü nungdaker, ta Saudi club nung ketdangtsür kati Hokulbarnü ashi.

Ronaldo ya Manchester United nungi asayadang November ita Everton makokba sülen tanur fan ka teka nungi mobile phone ka mazüka yokba asoshi iba temerenshi ya agütsü.

"Iba tenokdangba ya pa tenüng züluoba sülen amshitsü," ta Al Nassr ketdangtsür kati pa tenüng miimshia osangbener dang ashi.

Al Nassr-i tang tashi Ronaldo tenüng züluoka mali, kechiaser Saudi club nung bendanger asayar asoshi par

nem lemzüksüba dak alia bendanger asayartem anidena lir.

Ronaldo ya June 2025 tashi iba club nungi asayatsü asoshi sen euro million 200 shi agi anir aru aser pa ya Al Nassr indang bendanger asayar toku buba alitsü, koba Saudi football ketdangtsür temi melaba dang ka agi tali lir.

Pa indang registration ya Hokulbarnü tembangtsü, ta osang ka ajanga ashir saka shiba indoktsür memetet.

Saudi nunger osang ka ajanga ashiba agi, Ballon d'Or ponguben aser Champions League nung otsü yanglua goal agütsür nem Uzbek midfielder Jaloliddin Masharipov-i lenmang lapoktsüsü amai lir.

Ronaldo arur Al Nassr mezüng asaya ya Hokulbarnü Mrsool Park nung asayatsü, kong pa Mongulbarnü nüburtem dang sayua liasü.

Adelaide International: Djokovic aser Medvedev semi-final asayatsü



Adelaide, Aenjeti/January 06 (Agencies): Australian Open asoshi terenemshiba ka ama tennis asayar Novak Djokovic-i Adelaide International nung Hokulbarnü Denis Shapovalov madak 6-3, 6-4 agi takok anguba sülen semi-final nung taoba mapang Daniil Medvedev den asayatsü.

COVID-19 asoshi mozü magiba mechi taoba kum Grand Slam nung shilem agitsü lia par kidangi meyiba yokba sülen Djokovic ya Australia-i tanaben meyiba shilangdang pelashishia agizüka liasü aser arishi kum 35 tain Serbia nungba ya ayong-ayonga asaya arur.

Canada nunger world number 18, Shapovalov-i set tanabuba nung 3-3 tashi ngutet saka iba sülen Djokovic temaba jenjangi tua 5-4 akum aser takok angu.

Djokovic aser Medvedev na tesüiba mapang asemben asayaba nung Djokovic-i takok

ngua lir aser Medvedev-i tesüba madak takok anguba ya 2021 US Open final nung liasü.

"Ibai ano amming talang asütsü. Künaprongi junga serve mesüetra short points aikabo malitsü," ta Djokovic-i ashi, shibai tang tashinung Russia nungba madak 8-4 agi timba koka lir.

"Pa den asayatsü asoshi nü temang aser tekolok shisatsü renema alitsüla, kechiaser tesüiba kum pungo tsüngta asayar tajungtiba rongnung pa ka lir. Ni pa akumtsübur."

Seed tasembuba nung alisang Medvedev ya külem linük nungi Karen Khachanov madak 6-3, 6-3 agi takok ngua iba asayamung semi tongteta liasü.

Kasa asayamung nung Japan nungi Yoshihito Nishioka-i Australia nunger Alexei Popyrin madak 7-6(4), 6-7(8), 6-2 agi takok ngua America nunger Sebastian Korda den semi-final asayatsü lir.

National Boxing Championships nung Thapa, Hussamuddin nungeri gold angu



Hisar, Aenjeti/January 06 (Agencies): Hokulbarnü teburtem National Boxing Championship asaya nung Shiva Thapa aser Mohammad Hussamuddin nungeri pei temang tuozük telemsa nung gold medal nguteta liasü.

Ranking tsütsü defending champions Services Sports Control Board (SSCB) ya temaba nung medal 10 nguteta lir.

Otsü yanglua Asian medal trokben nguteta alisang Assam nungi Thapa yagi ayong ayonga Railways Sports Promotion Board (RSPB) nungi 2021 World Youth Championships bronze medallist Ankit Narwal madak 63.5kg final nung takok angua liasü.

Saka SSCB nungi

Hussamuddin-i asentzü sena asayar RSPB nungi 2016 World Youth champion Sachin madak 57kg final nung takok ngua liasü.

Taoba kum final nung tamakok ajurua alisang aser anaben Commonwealth Games bronze medallist yagi Hokulbarnü asaya nung kasa shisa kaa tsüngteper takok angu.

Narender (+92), 2022 Asian Championships bronze medallist ya 2022 Commonwealth Games silver medallist Sagar den final asayatsü liasü, saka Sagar temang tera yiruba ajanga shilem magiteti walkover agütsü.

Hussamuddin aser Narender den külemi SSCB nungi tsüngteper temi iba asayamung anogo tatembang buba nung kanga junga asayateta gold trok,

silver ka asr bronze asem nguteta liasü.

Iba telok nungi gold medal angurtemji ano Bishwamitra Chongtham (51kg), Sachin (54kg), Akash (67kg), aser Sumit (75kg) nungertem liasü.

Iba asayamung nung RSPB ya gold ana, silver asem aser bronze ana aser Punjab ya gold ka, silver ana aser bronze trok nguteta tanabuba aser tasembuba jenjang nung lir.

Abhimanyu Loura (80kg) aser Naveen Kumar (92kg) natia kanga meranga tsüngtepa gold nguteta liasü.

Naveen ya SSCB nungi 2021 Asian champion den taoba kum final ama asaya aser yangji Naveen-i takok ngua liasü.

2022 Asian Championships bronze medallist Govind Sahani (48kg) aser 2021 Asian bronze medallist Varinder Singh (60kg) natia RSPB atema gold nguteta liasü.

Punjab nungi Kartik (86kg) aser Karnataka nungi Nishant Dev (71kg) natia gold nguteta liasü. Iba asayamung nung temang tuozük telemsa 13 atema tsüngteper 386-i shilem agia liasü.

BILEMDANGANG

"Tamakok anguba shia nungi langkabosa angazüktsü merangang."